

易

通

變

欽定四庫全書

易通變卷二十九

宋 張行成 撰

經世撰著法序

易用象數有算有占算者先布一定之卦以御無窮之數其用在精術之精者算必密蓋取必於人為多也占者委聽圓變之著以求將見之象其用在誠心之誠者占必驗蓋取必於天為多也二者之用常相資固未可分其優劣然大易太元元包潛虛各有算數而占皆用

著者恃其心不恃其術必於天不必於人君子之道也
夫算之密者窮幽洞冥知而不言人何述焉知而輒言
天厭之矣是故古之深於數者不有人禍必有天殃而
讖緯之書治世常禁絕之也邵雍之數妙矣未嘗與人
言者為此而已今以占法用之則易元虛包之理而先
生之本心也著有四種易用四十九者七七以極少陽
也包用三十六者六六以窮老陰也元用三十三者五
六之合十一而三天也虛用七十者在七則體地之十

在十則用天之七也經世用七十二者四九為老陽之體六六為老陰之用體用合一陰陽相包太極之全也易虛一掛三元虛三掛一虛虛五掛二三揲皆用半包不虛不掛四營以存坤經世不虛不掛四用各半兩揲有交皆天地之理陰陽之義也其法如左

經世揲著法

七十二著合一曰太極分而為二以象兩置左不用揲右以四視其餘數一為元二為會三為運四為世既得

象矣復合而分

按原本分作合今改正

之取左之四并於右置左

不用揲右以八視其餘數為上卦之體復合而分之取
右之四并於左置右不用揲左以八視其餘數為下卦
之體二體相附既得卦矣復合而分之置右不用揲左
以六視其餘數自一為初訖六為上循其序次則知當
世直事之爻也

七十二著合一曰太極

伏羲先天易八正卦每卦包八卦均之一正卦得數

七十二故八節分一暮不過七十二候也七十二者
坤之策百四十四之半而三十六之合也三十六自
九言之四九為老陽之體先天易下卦數三十六兩
位而類聚者天託地以為體也自六言之六六為老
陰之用先天易上卦數三十六每位而均布者地託
天以為用也體用合一渾淪未分以當太極後天易
四十九著六用成一卦除掛一之著每卦得二百八
十八則三百八十四爻用其三不用其一也經世七

十二著四用得八卦與後天之數同分而為二用舍

各半則分陰分陽迭用柔剛之理而皆不出乎坤之

策百四十四也

易之策自坤用半至乾用四之三者用之用也經世之策用不用各半者

體之用也

分而為二以象兩

易有太極是生兩儀著之合一為太極分二象兩者

所以立體而起用也天下之理一不分則兩不立一

不立則體不成兩不合一則不通兩不通則用不行

上而太極下而纖芥其立體致用無非合而分分而合者故揲著之法象之也

置左不用揲右以四視其餘數一為元二為會三為運四為世

兩儀生四象分兩之後初揲以四者所以求象也置左揲右者易為逆數由右而生故也經世揲著法必先求象者易止六十四卦經世卦氣圖有二百五十六卦者元會運世各用六十四陽必有陰相為表裏

用於律呂圖則成五百一十二卦也以四求象既得其象於是求卦卦斯有主不然則四卦紛雜吾誰適從哉

既得象矣復合而分之取左之四并於右置左不用揲右以八視其餘數為上卦之體復合而分之取右之四并於左置右不用揲左以八視其餘數為下卦之體

四象生八卦再揲三揲以八者所以求卦也先取左數并於右而揲右者地數右行天之太極從之而右

行者天唱地男下女也後取右數并於左而揲左者
天數左行地之元氣從之而左行者地和天婦承夫
也先右後左之理在天地則為交泰在水火則為既
濟在男女則為咸感也左右相并者交也數以四者
天有四體陽陰太少一二三四地有四體柔剛太少
八七六五天交於地地交於天則天有陽陰亦有剛
柔而卦之上體亦有八七六五地有柔剛亦有陰陽
而卦之下體亦有一二三四於是六十四重卦之象

始備見於天地之間矣初終二揲不用交法何也七
十二著陰陽各半初以四揲者得天九地九終以六
揲者得天六地六天地各用兩不相資故不取交法
也惟以八揲者右得四八餘四為奇左得四八餘四
亦奇二奇相并乃成九八天地通用兩必相資故取
交法也卦數起於二終於十六總十五數以九為中
揲卦之數通用九者以其居初終之中當天地交會
之際是故先天方圖否泰損益咸恒既未濟當人路

鬼方之交其數其畫無非用九也抑又有說焉數十
五者中於九故八卦以九為中數數九者中於五故
九疇以五為中位左以四而并右則右得五八左餘
四八右以四而并左則右餘四八左得五八四為四
象五為五行四猶虛中五則用中也以先天卦圖觀
之下卦者天之地地之地也自一至八之數八八而
聚者八方奠居地之四也上卦者天之天地之天也
自一至八之數一一而變者二氣均布天之一也四

而得一天五乃見用由此行體由此立是故揲卦之數合則通用九者為體之中分則互用五者為用之中無非用中也夫孤陰寡陽不能生成初終雖不用交法亦未嘗獨用也四者體數右者地位以四揲右求體於地也總數則從乾而用九者陰非陽不生故天統乎體也六者用數左者天位以六揲左求用於天也總數則從坤而用六者陽非陰不成故地分乎用也若乃中揲左右各以八者體若一而分兩左右

通用九者用若兩而合一也是故陰陽合德而剛柔
有體以體天地之撰得天地日月交之用者惟人足
以當之人之生也不亦貴乎不知自貴同於一物矣
視其餘數而得卦者即乾一兌二離三震四巽五坎
六艮七坤八先天之數也

二體相附既得卦矣又合而分之置右不用揲左以六
視其餘數自一為初訖六為上循其序次即知當世直
事之爻也

八卦定吉凶繫辭焉以斷其吉凶謂之爻終揲以六者所以求爻也置右揲左者宗於一天天數左行故也每揲用半并之則四揲之中天地各應用三十六之二矣卦者陰陽之氣而為地體自上而下者分數也分數以陽數當之者陰自陽中生而下降於地也爻者剛柔之質而為天用自下而上者長數也長數以陰數當之者陽自陰中生而上升於天也先天用卦數皆自上生後天用爻象皆自下生即其理也元

包所用世爻者八卦每卦變七卦六十四卦各有當
世之爻經世所謂當世之爻者二百五十六卦千五
百三十六爻各以所得之爻為當世直事之用以二
世爻者視其分合踈親逆順勝負而吉凶粗見矣經
世占法象數用觀物爻辭用周易其餘五行萬事之
細用凡古今卜筮之術儻於世有益於理無害者皆
可通用於其間也易用四六四七四八四九以求爻
故其變極於四千九十六卦包用六六六七六八六

九以求卦故其變止於六十四卦經世先以四求象而後以八求卦以六求爻故其變至於五百一十二卦易為天包為物經世為地也

經世用五百一十二卦者八卦每卦變六十四卦也在易每卦得二百九十四策五百一十二卦總一十五萬五百二十八策以均於四十九著則每著得三千七十二策經世卦氣圖每爻直九十每卦五百四十總二百五十六卦得一十三萬八千二百四十為生物數者四十